



Pou Piblikasyon Imedya: 8/11/2023

GOUVÈNÈ KATHY HOCHUL

## **GOUVÈNÈ HOCHUL EGZÒTE NOUYÒKÈ YO POU PRAN PREKOSYON KÒM MOVE TAN IVÈNAL PREVWA AFEKTE VWAYAJ NAN KÈK KOTE JISKA JEDI MATEN**

*Kèk konte nan North Country, Mohawk Valley, reyon Kapital, ak reyon Mid-Hudson ta kapab wè jiska yon pou nèj lejè ak 1/4 pou akimilasyon glas espesyalman nan pi wo altitud yo*

*Kondisyon glas pandan vwayaj jedi maten espesyalman atravè altitud ki pi wo yo, pon yo, vyadik yo ak wout ki pa trete yo*

*Rafal van 56 km pou chak èdtan kapab lakoz blakawout izole nan kèk kote*

*Sekans siplément ak ekstrè son pou preparasyon kont tanpèt la disponib [isit la](#) yo soti nan men Frank Hoare, Direktè Egzekitif Enterimè Otorite Thruway NYS la ak Robert Fitch, Direktè Antretyen Transpò pou NYSDOT*

Gouvènè Kathy Hochul te ankouraje Nouyòkè yo jodi a pou pran prekosyon aswè a epi pandan vwayaj jedi maten an, paske yo prevwa lapli glase ak kondisyon glas ki vin apre yo prevwa afekte kèk pati nan eta a. Plizyè konte nan North Country, Mohawk Valley, reyon Kapital, ak reyon Mid-Hudson prevwa afekte pa move tan ivènal la, espesyalman nan pi wo altitud yo. Apati aswè a, yo prevwa yon nèj lejè ak grezil pou tranzisyone an lapli ak lapli glase k ap kreye kondisyon glase pou vwayaj jedi maten an. Kondisyon glas yo gen plis chans pou rive sou sifas ki wo tankou pon ak vyadik yo, ansanm ak wout ki pa trete yo, ak pi gwo akimilasyon glas yo prevwa atravè pi wo altitud yo. Gen kèk kote ki ka wè akimilasyon total nèj jiska yon pou ak akimilasyon glas anviwon yon ka pou. Rafal van ka soufle jiska 56 kilomèt alè pita nan jedi maten ak apremidi, sa ki ka lakòz blakawout izole nan kèk kote.

"Genyen yon chans pou lapli glse ak glas konmanse byen bonè jedi maten epi sa ka gen enpak sou vwayaj maten an nan plizyè kote ak kondisyon vwayaj danjere", **Gouvènè Hochul te deklare.** "Pandan ke Nouyòkè yo pa etranj ak move tan, mwen ankouraje nenpòt moun ki planifye vwayaje aswè a oswa demen pou pran prekosyon epi planifye yon ti tan anplis pou rive kote w prale. Ajans eta yo prepare pou ede gouvènman lokal yo jan sa nesesè pandan tout evènman ivènal sa a."

Yo te bay plizyè Avi kont Move Tan Ivènal la anvan sistèm metewolojik ivènal la kòmanse aswè a e ap l ap kontinye jiska jedi apremidi pou kèk kote. Pou kapab jwenn yon lis konplè sou alèt ak previzyon meteyo yo, vizite sit entènèt Sèvis Meteyowolojik Nasyonal (National Weather Service) la nan <https://alerts.weather.gov>. Nou ankouraje Nouyòkè yo pou enskri pou alèt ijans lè yo abone nan Alèt NY nan <https://alert.ny.gov>, yon sèvis gratis ki bay enfòmasyon ijans gratis sou telefòn ak òdinatè ou.

## **Preparasyon Ajans Eta yo**

### **Depatman Transpò (Department of Transportation)**

Depatman Transpò Eta a pare pou li entèvni avèk plis pae 3,500 sipèvizè ak operatè disponib nan eta a. Ekip reyjonal yo ap angaje kounye a nan aktivite preparasyon nèj ak glas epi tout ekipman yo pare pou deplwaye jan sa nesesè.

Kantite ekipman ki genyen nan tout Eta a repati konsa:

- 1583 gwo kamyon chasnèj
- 151 chasnèj mwayen
- 49 remòk chasnèj
- 328 gwo chajè
- 36 aparèy pou soufle nèj

Pou jwenn enfòmasyon sou kondisyon vwayaj an tan reyèl, otomobilis yo dwe rele 511 oswa vizite <https://www.511NY.org> oswa sit mobil la nan [m.511ny.org](http://m.511ny.org), sous enfòmasyon sou kondisyon vwayaj ak sikilasyon ofisyèl Eta New York la.

### **Otorite Thruway**

Otorite Thruway la pare pou li entèvni fas ak tanpèt ivènal la avèk 667 sipèvizè ak operatè disponib nan tout eta a.

Kantite ekipman ak resous ki genyen nan tout eta a repati konsa:

- 335 kamyon chasnèj pwa lou ak pwa mwayen
- 10 remòk chasnèj
- 62 chajè
- Plis pase 129,000 tòn sèl disponib

Yo itilize Pano pou Mesaj Varyab ak rezo sosyal yo pou avèti otomobilis yo sou kondisyon move tan ivè pandan yo sou Thruway la.

Otorite Thruway yo ankouraje otomobilis yo telechaje [aplikasyon mobil](#), li an, ki disponib gratis sou aparèy iPhone ak Android yo. Aplikasyon an bay otomobilis yo aksè dirèk ak enfòmasyon sou sikilasyon an nan tan reyèl, kamera sikilasyon yo nan tan reyèl, ansanm avèk asistans pou navigasyon pandan yo sou wout. Otomobilis yo ka enskri tou pou imèl [TRANSAert](#) k ap bay dènye enfòmasyon sou kondisyon sikilasyon sou Thruway la.

## **Konsèy sekirite**

### **Vwayaj**

Men kèk nan konsèy ki pi enpòtan pou woule ansekirite:

- Pa kondui, sof si sa nesesè.
- Si ou dwe vwayaje, asire ou ke otomobil ou gen materyèl pou siviv tankou lenn, yon pèl, flash ak pil anplis, rad cho anplis, yon pè chèn pou kawotchou, kab boustè pou batri, manje ki bay enèji rapid ak rad ki gen koulè klere pou sèvi kòm drapo detrè.
- Si ou gen telefòn selilè oswa lòt aparèy komunikasyon tankou yon wòki tòki disponib pou ou sèvi, kenbe batri a chaje epi kenbe I avè ou tout lè ou ap vwayaje. Si ou ta vin bloke, ou ap kapab rele pou mande èd, enfòme sekouris yo sou kote ou ye.
- Prensipal kòz lanmò ak blesi pandan tanpèt ivè se aksidan transpò. Anvan ou chita dèyè volan, pa blyie retire glas ak nèj ki sou machin ou an; bon vizyon se sekrè kondui byen. Planifye arè ou yo epi kite plis distans ant machin yo. Pote plis atansyon epi sonje pil nèj yo ka maske timoun ki pi piti yo. Toujou koresponn vitès ou selon kondisyon wout la epi selon meteyowolojik.
- Li enpòtan pou chofè ki sou tout wout yo konnen vitès chasnèj yo se 56 kilomèt alè, sa ki nan anpil ka pi ba pase limit vitès ki make a, pou yo ka garanti sèl yo simen an rete nan vwa sikilasyon yo epi pa dispèse andeyò wout yo. Anpil fwa sou otowout ant eta yo, chasnèj yo opere kòtakòt, kòm se fason ki pi efikas epi ki ofri plis garanti pou netwaye plizyè vwa yon sèl kou.
- Chofè machin ak pyeton dwe sonje chofè chasnèj yo ka wè devan yo sou yon distans limite, epi gwo sè ak pwa chasnèj yo ka fè l difisil pou maneuvre epi frennen touswit. Nèj chasnèj la ap soufle dèyè li ka diminye vizibilite anpil oubyen kreye yon vwal blan. Chofè machin yo pa ta dwe eseye double chasnèj yo, ni swiv yo twò pre. Kote ki gen plis sekirite pou chofè machin yo woule se lwen dèyè chasnèj yo, kote wout la klè epi gen sèl sou li. Pa janm eseye pase sou yon chasnèj pandan l ap fonksyone.

### **Blakawout yo**

- Tcheke konpayi sèvis piblik ou a pou ou ka konnen orè reparasyon nan zòn nan.
- Etènn oswa deploge limyè ak aparèy menaje pou ou ka evite yon sichaj kouran lè yo repare sèvis la: kite yon limyè limen pou endike lè yo te retabli kouran.
- Si chalè a ale pandan yon tanpèt ivènal, kenbe kay la cho lè w fèmen chanm ou pa bezwen yo.
- Pou rapòte yon blakawout, rele:
  - Central Hudson: 800-527-2714
  - Con Edison: 800-752-6633
  - National Grid (Rezo Nasional): 800-867-5222
  - NYSEG: 800-572-1131
  - O&R: 877-434-4100
  - PSEG-LI: 800-490-0075
  - RG&E: 800-743-1701

## **Sekirite pou Chofaj**

- Sèvi ak sous chalè altènatif ki an sekirite sèlman tankou yon chemine, ti recho a bwa oswa a chabon ki byen ayere oswa aparèy chofaj pòtab.
- Lè w ap itilize sous chalè altènatif tankou yon chemine, recho a bwa, elatriye, toujou asire w ke ou gen bon vantilasyon. Toujou Swiv enstwiksyon fabrikan yo.
- Kenbe rido, sèvyèt ak manchon pwoteksyon yo lwen sifas cho.
- Gen yon ekstenktè ak detektè lafimen epi asire w yo fonksyone.
- Si w itilize aparèy chofaj ki mache ak kewozèn pou konplete gaz chofaj regilye w la, oswa kòm yon sous chalè ijans, swiv konsèy sekirite sa yo:
  - Swiv enstwiksyon fabrikan yo.
  - Sèvi ak gaz ki kòrèk la sèlman pou inite w la.
  - Remete konbistib deyò sèlman epi lè inite a frèt sèlman.
  - Kenbe aparèy chofaj nan yon distans omwen twa pye ak mèb yo lòt eleman konbistib yo.
  - Lè w ap itilize aparèy chofaj la, sèvi ak pwoteksyon kont dife epi vantile byen.

Pou plis konsèy sekirite sou Ivè a, vizite <https://dhses.ny.gov/safety>. Pou tout bezwen sèvis ki pa ijans nan Eta New York anvan, pandan oswa apre yon tanpèt, rele 211 oswa vizite <https://211nys.org>.

## **Enfòmasyon sou Divizyon Sekirite Teritwa ak Sèvis pou Ijans**

[Divizyon Sekirite Teritwa ak Sèvis pou Ijans yo](#) (Division of Homeland Security and Emergency Services, DHSES) ofri direksyon, kowòdonasyon ak soutyen pou anpeche, pwoteje kont, prepare pou, reponn a, rekipere apre, epi diminye katastwòf ak lòt ijans. Pou plis enfòmasyon, swiv @NYSDHSES sou Facebook, Instagram, ak X (ke yo te rele Twitter) oswa vizite [dhses.ny.gov](https://dhses.ny.gov).

###

Lòt nouvèl disponib sou sit [www.governor.ny.gov](http://www.governor.ny.gov)

Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418  
Enskri pou w jwenn mizajou Biwo Gouvènè a: [ny.gov/signup](http://ny.gov/signup) | Voye tèks NEW YORK bay 81336

[ANILE ENSKRIPSYON OU](#)